

Un victima di abuso sexual

"No Marcam'i"

LOKE cu a bin ta halando atencion e ultimo simannan t'e cantidad alarmante di casonan di abuso sexual cu a wordo denuncia of descubri. Hopi hende ta papia di denuncia e casonan, "publica potret y nomber di e sinberguensanan", lubidando riba e victima, con of kico e mes ta sinti den situacionnan asina.

Tur victima di violacion, abuso sexual, actonan di inmoralidad y acoso sexual, tin algo comun: Berguensa. E sentimento aki ta lanta despues cu e victima pasa den algo asina traumatico, y cu ta keda e berguensa y miedo di wordo señala dor di otroonan, marca dor di otroonan rond di nan. "Su mesun tata a abusa di dje, su omo a mishu cun'e, e amigo di su mama a tene relacion cun'e, e amigo di infancia burachi a fors'e pa tene relacion cun'e". Expresionnan cu tur hende a yega di scucha. Polis a anuncia e siman aki cu no menos cu 33 caso a wordo atendi caba dor di Cuerpo Policial pa loke ta bay di aña. AWEMainta por a compronde for di otro fuentenan, cu e cifra inoficial ta hopi mas halto. Hopi lo puntra di con e casonan no ta wordo denuncia: pa berguensa y mas cu tur cos, e victimanan (hoben y adultonan) tin e miedo di wordo marca y keda marca resto di nan bida dor di tur esnan cu conoce nan.

AWEMainta a combersa cu un victima di abuso sexual. Un señora di edad halto caba, kende atrobe pa miedo no kier duna ni su edad ni su nomber, corda unda e hechonan a tuma lugar.

"E cos ey a pasa cu mi ora cu mi tabatin 8 pa 9 aña. Mi ta bin di un famia pover, e tempo ey. Pero mi no tabata compronde tampoco cu loke e dos familiarnan a haci cumi tabata malo. Mi a bin realisa esaki te ora cu mi tabatin 12 aña segun mi."

E señora a sigui conta cu e ta corda si cu e personanan cu a comete e acto cun'e tabata haci'e ora cu nan tabata

bou influencia. Y e tempo ey e cos tabata tabu.

"Hopi biaha si un mama ta sospecha algo asina mes, e ta pensa cu t'e yiu a causa cu e cos a tuma lugar. Y e reaccion di mi mama mes, ora cu mi a cuminsa crece tabata "si mi mester haya sa algo mi ta mandabo Corsou, laga nan internabo den un lugar". Esaki hopi biaha tabata bini pa falta di educacion tambe y no di amor pa su yiu."

E victima aki a conta nos con su mama tabatin miedo pa algo pasa cun'e, pero alabes tabata manera acus'e di ta culpabel si algo mester pasa.

"P'esey mi ta contento cu mi mama a bay sin cu mi a cont'e loke cu a pasa cumi na man di dos familiar."

E sucedido a dunam'i miedo. Un miedo grandi pa hendenan haya sa kico a pasa cu mi. Pero tambe un berguensa, cu tabata mas grandi cu e miedo. Ora cu bo ta den bo hubentud y e temponan aya, e informacionnan tabata limit'a.

"Si mi denuncia e hendenan, mi mama ta haya sa, mi rumannan ta haya sa, mi tanta y omonan ta haya sa, mi primonan ta haya sa. Mi bisiñanan ta haya sa. Mi compañeronan di scol ta haya sa. Mi lo no por soporta nan mirada. E lo sali den corant cu mi nomber. Mi ta keda marca pa resto di mi bida, mes hopi cu e acto cometi dor di mi mesun famia. Tur esaki a pone cu mi a carga cu e horibel secreto aki practicamente henter mi bida.

Un secreto cu a afectam'i den mi relacion a lo largo di mi bida. Mi a aleha di mi famia y biba semper den mi mes. Mi tabatin miedo di tene relacion sexual p'e homber no descubri cu mi no ta virgen mas y mi wordo reprocha. A inventa tur sorto di storia di un bida cu mi a hiba, cu en realidad mi no a hiba. Mi no tabata sintimi comodo den ningun tipo di relacion den tur e añanan di mi bida. Mi no por expresa mi sentimentonan.



Y semper a keda carga cu e berguensa con mi famia lo mirami si nan haya sa e cos aki. Asina hopi cu mi tabata puntra mi mes di con mi no por stima of bisa un hende cu mi "stim'e". Mi ta corda un biaha un juffrouw tabata papia di e tema stima y mi a contest'e cu mi no sa kico esey ta nifica. Ami no por stima ningun hende.

El a puntram'e: Bo ta stima bo mama? Mi contesta tabata: Mi no sa. Y e pregunta aki a keda den mi mente te dia di awe. Mi ta stima un hende of mi ta custumbra cu e hendenan rond di mi. Mi sa cu si algo pasa nan, e lo causami hopi tristesa y dolor. Esey ta nifica cu mi stima nan? Mi no por contesta e pregunta. Te ainda mi tin miedo."

Esey t'e motibo cu e victima aki ta bisa cu emocionnan halto n'e momentonan aki por causa hopi mas daño cu nan ta pensa. Publicando potret di sospechosonan y nan nomber por causa cu mañan facilmente por wordo scucha: Bo amigo ey ta yiu di "Soraida G (un nomber ficticio), kende a wordo abusador di su mesun tata of welo ora cu e tabatin 8 aña" y asina e redo ta sigui core rond.

"Mi no kier ningun hende pasa den e situacion cu mi a pasa y tampoco mi no kier pa abusadonan pasa nan bida sin wordo castiga. Pero mi kier pa e victimanan wordo protegi y mi no kier pa otro hendenan inocente no haya nan mes afecta pa algo cu nan no ta responsabel p'e, algo cu a wordo cometi dor di nan tata, omo, welo. Pasobra e familiar di e abusadornan tambe por keda marca pa resto di nan bida. E ta un dilema cu ami como un victima a carga cun'e mi bida largo. Si mi a papia, hopi rond di mi lo a sufri e consecuencianan."